



24. januar 2022

UPA2022/102

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

**Nunatsinni qimussertarnermik kulturip ineriartortinneqarnissaanut tammatsaaliorneqarnissaanullu Arctic Nomads innersuussutai 22-vit<sup>1</sup> isumassarsiorfigalugit periusissiorneqarnissamik Naalakkersuisut peqquneqarnissaannik Inatsisartut aalajangiiffigisassaattut siunnersuut. Periusissiaq sapinngisamik qimmeqarfinnik ataasiakkaanik suleqateqarluni suliarineqassaaq. Periusissiaq kingusinnerpaamik UKA2023-imi saqqummiunneqassaaq.**  
(Inatsisartunut ilaasortaq Doris J. Jensen, Siumut)

**Tungavilersuut:**

UKA2020 imm. 111 aaliangiiffigisassamik siunnersuuteqarpunga, siunnersuut ataatsimiititaliamut ingerlateqqinneqarpoq. Ataatsimiititaliaq susassaartoq allannguutissamik siunnersuuteqarpoq qulaani qulequtsiussamma assignanik.

April 2021 Inatsisartunut qinersisoqarmat siunnersuut kivivoq, neriussimagaluarpungalu Naalakkersuisunngortup siunnersuut suliasatut ingerlateqqissagaa. Ulloq manna susoqarniarneranik tusagaqannginna matumuuna siunnersuut qaqeqqippara tamatumuuna ataatsimiititaliap allannguutissatut siunnersuutiginikuusaa qulequtaliullugu.

Qimussertarnerup kultoorikkut ineriartorteqqinnissaanut tammatsaaliornissaanullu periusissiamik peqalernissaq pingaaruteqartutut isumaqarfigaara, tassami qimmit qimuttut ikiliartuinnassanngippata immikkut iliuseqarnissaq avaqqunneqarsinnaanngilaq. Qimmeqarneq akisoorujussuuvoq, qimmit qimuttut annertuumik unammillerneqarput soorlu qamuterallannik, silap pissusaata allanngorneranik allarpassuarnillu taamaattumik siuarsaaqqissagutta qimussertartut siunnersuutaat tusaaniarneqartariaqarput soorlu Arctic Nomads-imi aaliangersarneqarsimasut 22-t, KNQK-p anguniagassatut aaliangiussaat Qimmeq projektillu saqqummiussaat tungavigalugit.

Pingaaruteqarlunnarpoq immikkut ittumik qimmit qimuttut ukiorpanni piusimasut illersorneqarnissaat.

---

<sup>1</sup> <https://uni.gl/media/5958858/arctic-nomads-anbefalinger.pdf>



Taamatut siunnersuuteqarlunga neriuutigaara siunnersuut ilassilluarneqassasoq.

Nunatsinni qimmit qimuttut ikiligaluttuinnarput, 1990-kkunni 35.000 missaanniissimagaluarput maannakkulli 15.000 ataappaat.

Ilaatigut tungaviuvoq silaannaap allanngoriartornera, snescooterinik unammillerneqarneq allarpassuarnillu minnerunngitsumik arlalinnik qimmeqarluni akisunera.

Kalaallit qimmia qimuttoq ukiorpassuarni nunatsinni uumasuusiq illersussagutsigu immikkut iliuseqarnissaq avaqqunneqarsinnaanngilaq.

2016-imi Arctic Nomads Sisimiuni ingerlanneqarmat anguniagassat 22-t saqqummiunneqarput, taakkunani ilaavoq anguniarneqassasoq qimmiutilinnut nerukkaatissarsiuutissanut akileraartarnikkut oqilisaassinissaq.

Isuma tamanna soqutiginarpoq taamaammat siunnersuutigaara nerukkaatissanik pisisarnermi akileraartarnikkut oqilisaassinissaq anguniarlugu Naalakkersuisut nalunaarusiussasut inatsisartunullu saqqummiullugu

**Pisortanut aningaasatigut allaffissornikkullu kingunerisassat:**

Naatsorsuutigineqarpoq nunatsinni qimussertarnermik kulturip tammatsaaliornissaanut periusissiap suliarineranut aningaasartuutit 500.000 kr qaangernaviannikkaat.

**Namminersorluni inuussutissarsiuuteqarnermut aningaasatigut allaffissornikkullu kingunerisassat:**

Soqanngilaq

**Innuttaasunut aningaasatigut allaffissornikkullu kingunerisassat:**

Soqanngilaq